



## Acabbu de su servítziu de Isportellu Linguísticu

S'operadori de s'Isportellu Linguísticu de su Progetu "Sa Marmidda chistionat in Sardu", cun su Comunu de Tuili cabufile impari a is Comunas de Barùmini, Is Pratzas, Gésturi, Setzu e Biddanoia Franca, finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018, fait isciri chi oi, su 29 de Donniasantu 2024, est s'úrta dí de servítziu.

Su Progetu, cumentzau in su mesi de Gennarxu de ocannu, est sighiu finas a oi cun unas cantu atividades: su servítziu de consuléntzia a sa tzitadinàntzia; su de iscritura de artículus e de nobas chi ant pertocau totu su territóriu, cun sa promotzioni de situs archeológicus e de importu istóricu, festas, crésias, museus, e aici sighendi, e fintzas in pitzus de chistionis generalis e atualis; unas cantu genia de atividades culturalis, fatas gràtzias a su trabballu de is àterus operatoris, dedicadas a bortas a is piciocheddus prus piticus po mesu de laboratórius didàticus, giogus e àteras cosas pentzadas po ddus fai ispassiai, e a bortas a is prus mannus, cun leturas de líbburus e ciaciarradas.

In prus, gràtzias a su Progetu, funt istétias cuncordadas unas cantu essidas de genia culturali, cun abbisitas a logus aundi is ghias ant fueddau totu in Sardu: sa primu in Casteddu, a pustis a Orgòsolo e Mamojada po fai su Giru de is Muralis e a biri su Museu de is Màscaras Mediterràneas, a e s'úrta de cras, su 30 de Donniasantu, a Nùgoro, a bisitai su Museu Etnogràficu e, po serrai in bellasa, sa Domu de Gràtzia Deledda.

Est istétiu un'annu de satisfatzionis e de cuntentus, e duncas torraus gràtzias a totu is chi s'ant agiudau, est a narri a is Amministradoris, a is chi trabballant in is Entis e in totu is logus pùbbicus (iscolas, bibliotecas e aici sighendi), e a totu is tzitadinas e tzitadinus chi ant partetzipau a is atividades, sèmpiri cun sa punna de agiudai a ispaniai s'impreu de su Sardu in calisiat cuntestu.

Gràtzias, Marmidda, e a si torrai a biri luegus!

\*\*\*

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.